

DJAWEPS

Profetanan Berdadero i Falsu, Bieu i Nobo

E don profétiko ta limitá na pasado?

Despues di un reunion di iglesia, un teenager a hasi e pregunta kla i direkto aki: “Dikon Dios no ta papia ku mi?”

E kontesta fásil lo tabata ku Dios ta papia ku kada un di nos a traves di e Beibel. Pero e teenager akí kier a sa dikon Dios no ta papia *kunÉ*.

Hopi kreyente ta puntra nan mes dikon Dios no ta papia direktamente ku nan awendia. Miéntras ta bèrdat ku El a papia ku nos den pasado a traves di e profetanan i spesialmente pa medio di Su Yu (Hebr. 1:1), nos por bien puntra: Dikon E no ta papia ku nos den nos tempu? Ora nos kontestá e pregunta akí, nos ta konsiderá si e don profétiko a stòp ku terminashon di e kánon di Beibel, òf si Dios a lanta profetanan for di e tempu ei òf lo hasi esei den futuro.

Un Don ku a Stòp?

Ta eksistí dos punto di bista enkuanto di e valides di e don profétiko. Sesashonistanan ta kere ku donnan spiritual, manera papia den lenga, profesia, i sanashon, a stòp despues di e era di e apòstelnan. Di akuerdo ku e punto di bista aki, eseinan tabata donnan sobrenatural ku tabata intenshoná pa funshoná komo un señal den konteksto di e surgimentu di e iglesia Kristian i e plamamentu inisial di e evangelio. E punto di bista kontrali ta kontinuashonismo, kua ta siña ku

Spiritu Santu por drama donnan spiritual na kualke momentu riba hendenan ku no ta e 12 disipelnan original.

Sesashonismo ta rechasá e posibilidat di un rekuperashon di e donnan, ku ta apelá na e prinsipio di *sola scriptura*, i ta insistí riba tres proposishon: (1) e konklushon di e kánon bíbliko; (2) e outoridat infalibel i suficiente di Beibel; i (3) e suficiensia perfekto di e Skrituranan pa guia e iglesia. Den otro palabra, nan ta kere ku e testimonio duná den e kánon final di Beibel ta suficiente pa guia e iglesia te na e tempu di fin.

Banda di siña e Palabra i komuniká e boluntat di Dios komo un ministerio regular i sostené, sinembargo, profetanan hopi biaha tabata ser mandá den senarionan di krísis. Den tempu di difikultat, kreá sea pa kousanan eksterno òf dor di kondishonnan interno di apostasia, profetanan tabata proveé guiansa meimei di konflikto i konfushon den e situashonnan spesial akí òf simplemente tabata trese un mensahe spesial na un sierto punto den e plan di salbashon.

Algun di e profetanan akí no a bira parti di e kánon (por ehèmpel, Natan, Ahias, i Ido [2 Kron. 9:29]). Loke e profetanan no-kanónico tabata bisa òf skirbi tabata outoritativo i obligatorio pa e pueblo di nan tempu (2 Sam. 12:7-15), pasobra e outoridat di un eskrito profético tabata ankrá den su inspirashon. E don profético di e profetanan no-kanónico no a ser duná pa remplasá e testimonio di e profetanan kanónico, pero mas bien pa satisfasé un nesesidat spesífiko di e pueblo di Dios. Mester ser bisá, sinembargo, ku loke profetanan asina tabata siña tabata den harmonia ku e revelashon di Dios na e profetanan kanónico.

For di tempu di Juan e reveladó, e kánon bíbliko a ser será, i otro bukinan inspirá no por a ser añadí. E pregunta ku nos ta hasi awe ta: Tabatin otro profetanan mandá di Dios for di final di e kánon bíbliko? I lo por lanta un den presente òf futuro?

Un Don Deseabel

Tèstamènt Nobo ta duna un lugá prominente na e don di profesia entre e donnan di Spiritu Santu. Realmente, na un okashon apòstel Pablo ta dun'é promé lugá meimei di e ministerionan di mas útil na e iglesia, i na dos okashon e ta dun'é di dos lugá (lesa Rom. 12:6; 1 Kor. 12:28; Efe. 4:11). Ademas, e ta enkurashá kreyentenan pa deseá e don akí ku hopi fervor (1 Kor. 14:1, 39), aunke Spiritu Santu semper ta duna Su donnan manera E ke.

Pablo ta mustrá dos biaha ku Dios a nombra profetanan denter di e iglesia (1 Kor. 12:28; Efe. 4:11). Mas ainda, e ta afirmá ku e iglesia di Tèstamènt Nobo a ser konstruí riba e fundeshi di e apòstelnan i profetanan (Efe. 2:20). Esakinan ta profetanan di Tèstamènt Nobo pasobra, manera Pablo ta bisa den Efesionan 3:4, 5, e Spiritu a revelá e misterio di Kristu na apòstelnan i profetanan ku no a ser hasí konosí na generashonnan anterior. Nos ta konkluí ku e manifestashon akí di e don di profesia no tabata limitá na e kánon.

Un Don pa e Tempunan di fin

Hesus a deklará ku profetanan falsu ku l a bisa ku nan ta profetisá den Su number lo a aparesé (Mat. 7:15-23) riba e tera akí. E profetanan falsu akí lo tabata aktivo den e tempu di fin, mustrandó señañan i maravianan, i purbando na gaña asta e skohínan (Mat. 24:24). Hesus a duna e spièrtamentu akí pasobra lo a aparesé un falsifikashon profétiko ku lo tabata den kontraste ku e don genuino den e tempunan di fin.

Papiando partikularmente di e tempu di fin, Joel, den forma profétiko, ta anunsiá e dramamentu abundantemente di e Spiritu di Dios riba Su pueblo. E dramamentu akí lo a

manifestá su mes den hóbennan ku lo mira vishonnan, den ansianonan ku lo soña soñonan, i riba yunan hòMBER i muhé ku lo profetisá (Joel 2:28, 29). Kon nos sa ku Joel ta referí spesífikamente na e tempu di fin? Pasobra e profesia akí ta establese e kuadro di tempu pa e manifestashonnan di e don di profesia. E ta menshoná fenomenonan kósmiko manera biramentu skur di solo i luna ku a bira sanger. E ta papia tambe di desasternan riba tera, kua ta ser deskribí den forma misterioso manera “sanger i kandela i kolumnanan di huma.” Tur esakinan mester bin promé ku “e dia grandi i temibel di Señor” (v. 30, 31).

Apòstel Pedro a apliká e profesia di Joel na e eksperensia di Pentekòste (Echonan 2:16-21), kua ta konektá e don di profesia ku e don di lenga. Dikon? profesia di Joel di e don di profesia benidero ta ser menshoná den konteksto di e áwaseru trempan i lat (Joel 2:23-32). Awaserunan di hèrfst, kua ta permití e simia spreit i saka rais, tabata ser yamá áwaseru trempan. Yobidanan di primavera, kua tabata hecha e grano i prepará pa e kosecha, tabata ser yamá e áwaseru lat. Tèstamènt Bieu ta uza e fenómeno akí di e siklo agríkola palestino komo un símbolo di e don spiritual ku Dios ta duna Su pueblo pa medio di Su Spiritu (Oseas 6:3).

Pedro i e otro apòstelnan a eksperensia e áwaseru trempan. E áwaseru lat lo a bin ku e mesun poder di e Spiritu, i e pueblo di Dios lo manifestá e don di profesia meimei di nan. Awe, miéntras nos, “e remanente ku Señor ta yama” (Joel 2:32), ta spera e pronto regreso di Hesus, nos ta ser invitá pa eksperensia e áwaseru lat spiritual. E dramamentu akí di Spiritu Santu lo ta mas abundante ku esun anterior. E lo laga “boso yunan hòMBER i muhé . . . profetisá, boso ansianonan . . . soña soñonan,” i “boso hóbennan . . . mira vishonnan” (v. 28).

Hesus a duna un spièrtamentu tokante profetanan falsu pasobra lo a aparesé un falsifikashon profétiko ku lo tabata den kontraste ku e don genuino den e tempu di fin.

SUGERENSINANAN PA ORASHON

1. Hasi orashon spesífikamente pa persepshon den e profesianan di Tèstament Nobo ku ta papia na nos tempu.
2. Pidi Dios ta implantá Su bèrdatan di forma asina kla den bo mente ku nunca lo bo ser gañá dor di un engaño sabí.
3. Ekspresá na Dios bo desishon pa konfi'E pa guia bo den tur kos i warda bo for di e peligernan di profetanan falsu.